



EDICION SPECIAL

HIMNO Y BANDERA

Nos Piachenan

(Skirbi pa Hubert Booi den Brindis 1975)

Piache tabata e nomber indian pa e curiosonan cu tabata cura hendenan, sea cu yerbanan di tera of di otro forma. Promenan aya y te ainda nos mes hendenan ta papia cu un cierto di menosprecio of tin biaha cu desprecio, ora nos tende e bieunan conta cu tal y tal yerba ta cura hende.

No laga duda cu e creencia den e yerbanan curativo a disminui cu e civilisacion moderno cu nos ta experimenta dia pa dia. E mes hobennan ta hari den un forma di bofon, pa asina pone comprende cu nan si no ta kere den e coy loco ey mas, cu nan si ta civilisa, no manera e indiannan salbahe di tempo prome.

E idea di salvahismo a keda asina graba den mente di nos hendenan pa e descubridor y colonisadornan cu te ainda, hasta nos cu ta bao di impresion di tin un inteligencia y civilisacion superior cu tur loke tabata prome cu nan, ta kere

eroneamente cu e indianan pa motibo di no tabata bisti ni tabata tin e forma di biba manera e descubridornan, tabata nada otro cu animalnan riba dos pia cu no por a razona.

Y ey den nan ta malamente equiboca, inocentemente nan ta, sin nan por yuda, sin nan mes ta sinti, nan ta victima di e educacion cu nan a ricibi, pero cu awor ta cambiando cu tur loke nan antepasadonan tabata haci tabata bobedad y ta loke nan siña awor ta coy sabi.

Nan no ta realiza cu e Piachenan no tabata cualkier indian ignorante, sino un investigador serio cu conoce cada mata y cu a experimenta temponan largo mescos cu e investigadornan di awor cu nos ta yama cu un palabra grandi "researcher", of investigador científico.

Nan tabata uza e matanan ora cu nan tabata tin siguranza cu tal sorto di mata ta cura tal y tal enfermedad.

Con cu nos kier yame,

ta un cierto di ciencia cu tabata pasa di piache pa piache di tata of mama pa yiu.

No solamente nan tabata cura malesa di curpa sino tambe cura malesanan mental, esta enfermedadnan psico-somatico. E indiannan tabata tin confianza den nan Piache, ta pa tal motibo nan tabata cura hasta ulcera na stoma, cu ta un lesion emotivo. Nan tabata psiquiatronan, pa uza un palabra moderno, mes bon, kizas mas bon, cu hopi di esnan moderno cu ta practica cura mental di enfermonan.

Si nos ripara no tin nada mihor cu remedi di tera, cu ta mucho mas eficaz cu tur e remedinan patenta, cu ta cura malesa un banda y dañá stoma otro banda.

Y pa bisa berdad, mayoria di e remedinan ta trata cue mesun mata cu e Piachenan tabata uza. Den otro palabra, e Piachenan tabata e precursornan di e remedinan cu nos ta cumpra awor na e boticanan.

Na aña 1542, ora cu e Emperador Carlos V kier manda algun docter pa e territorio di mundo nobo, Hernan Cortez a nenga y contesta cu aki mes tin, cu no ta necesario, pasobra e mes tabata un cu e Piachenan a cura dia nan a heride den bataya.

Un pastor Spaño cu tabata estudiante di medicina a declara cu e Piachenan di aki banda tabata maestronan den conoce propieadnan curativo di e yerbanan. E nomber di esnan cu tabata trata exclusivamente cu yerbanan tabata yama "Machi" pues no un diminutivo di "Ma" manera nan kier pretende, sino cu "Machi" tabata nomber di e bakianonan cu conoce yerba.

Y ta e mes "Machi" y Piachenan a siña docternan Spaño e tempo aya pa

conoce mas cu 200 sorto di yerba curativo. Ora docternan tabata faya, hasta e Spañonan mes tabata acuei cerca e Piachenan pa nan cura.

Ainda na Aruba tin algun di e expertonan cu conoce calidad curativo di varios mata cu lastimamente ta cabando na Aruba. Cientificonan moderno no ta propaga uzo di yerbanan di cas cu ta cura, si hasta nan ta descurasha hende pa uze. No laga duda cu no ta tur yerba ta bon pa tal y tal malesa, pero si tin cu ta cura mihor y cabalmente cu malesa, contal bon uza.

Lo ta interesante pa mencionar, cu nos indiannan prome cu yegada di descubridornan no tabata afecta pa tuberculosis, ni peste, ni tifus, ni lepra, ni sarampi. Tur e enfermedadnan ey a dreña cu yegada di descubridornan.